

आकाशवाणी

- प्रधानमंत्री नरेन्द्र मोदी होर अज्ज मुंबई च भारतीय रिजर्व बैंक दे 90 ब'रे पूरे होने दे सिलसिले च इक कार्यक्रम च हिस्सा लैंगन।
- विदेश मंत्री डॉ. एस.जयशंकर होरें आक्खेआ ऐ जे हून जी-20 दा मंच सांस्कृतिक संतुलन पर बी केन्द्रित ऐ, इस करिये असें गी अपने विरसे, सभ्यता, परम्पराएं, संस्कृति ते आस्थाएं मानताएं गी बी अग्रे आनना लोडचदा।
- पच्छिम बंगाल दे जलपाईगुडी जिले दे किश हिस्सें च कल आए दे चक्रवाती तूफान च चार जनें दी मौत ते 100 घायल।
- टेनिस च इटली दे जानिक सिनर नै मियामी ओपन प्रतियोगिता दा मर्दे दा सिंगल खिताब जिती लैता ऐ, डबल्स दा खिताब भारत दे रोहन बोपन्ना ते उंदे आस्ट्रेलियाई जोड़ीदार मैथ्यू एबडेन नै जितीआ।
- आईपीएल च दिल्ली कैपिटल्स नै चिन्नेई सुपर किंग्स गी 20 रजे कन्नै हराया। अज्ज मुंबई इंडियंस दा मकाबला राजस्थान रायल्य कन्नै होग।

<><><><><><>

PM-Mumbai RBI

प्रधानमंत्री नरेन्द्र मोदी होर अज्ज इक दिनै दे मुंबई दौरे पर रौंहगन। अपनी यात्रा दरान ओ भारतीय रिजर्व बैंक दे 90 ब'रे पूरे होने दे मौके पर लोआए जा'रदे समारोह च शामिल होंगन। भारतीय रिजर्व बैंक नै पैहली अप्रैल 1935 च कम्म करना शुरू कीता हा ते अज्ज एह अपने 90में ब'रे च दाखल होआ करदा ऐ। इस मौके पर लोआए जा'रदे समारोह च केन्द्री खजाना मंत्री निर्मला सीतारमण ते खजाना राज्यमंत्री भागवत किशनराव कराड ते पंकज चौधरी होर बी हिस्सा लैंगन। रिजर्व बैंक दे गवर्नर शक्तिकांत दास होर बी इस कार्यक्रम गी संबोधत करगन।

महाराष्ट्र दे मुख्यमंत्री एकनाथ शिंदे, उपमुख्यमंत्री देवेन्द्र फडणवीस ते अजीत पवार, बक्ख-बक्ख बँके दे प्रतिनिधि ते केई उद्योगपतिएं दे इस समारोह च हिस्सा लैने दा कार्यक्रम ऐ।

<><><><><><>

Jaishankar

विदेश मंत्री डॉ. एस.जयशंकर होरें भारत दी अध्यक्षता च जी-20 आयोजन गी “सियासी” ते “आर्थिक” क्षेत्र गी परतियै संतुलित करने दी इक बेहतरिन मसाल करार दिंदे होई आक्खेआ ऐ जे समूलचे मुख्यै जी-20 दी साढ़ी अध्यक्षता दा जशन मिलियै मनाया। कल नमीं दिल्ली च सभ्यता फाउंडेशन दे दिल्ली विरासत कार्यक्रम च उनें आक्खेआ जे जी-20 कार्यक्रम केई मायने च सियासी ते आर्थिक पुनर्संतुलन दी इक टकोहदी मसाल रेहा, जित्थें दुनिया गी चलाने आले, दुनिया गी प्रभावत करने आले ते दुनिया पर हावी होने आले किश मुख्यें दे बजाए, एहदा दायरा काफी व्यापक होई गेआ ऐ। एहदे च साफ तौरा पर भारत दी भूमका गी इक टकोहदी पंछान थोई। विदेश मंत्री होरें आक्खेआ जे आर्थिक ते सियासी क्षेत्र गी परतियै संतुलित करने दे कन्नोकन्नी हुन जी-20 दा मंच सांस्कृतिक पुनर्संतुलन पर केन्द्रित होई चुके दा ऐ ते इस करियै साढे लेई हुन इब्बी बड़ा जरूरी ऐ जे अस अपने विरसे, अपनी सभ्यता, अपनी संस्कृति, रैहन सैहन, आस्था ते मानताएं गी बी सामनै रखचै।

<><><><><><>

Hail Strom

पच्छम बंगाल दे जलपाईगुड़ी जिले दे किश हिस्से च कल आए दे चक्रवाती तूफान च चार जनें दी मौत ते सौ शा बद्ध घायल होई गे। उत्तर बंगाल दे इस तूफान च जलपाईगुड़ी शैहर ते मैनागुड़ी इलाके च केई घर ढेई गे ते बूहटे सनें जड़ें उखड़ी गे। पूर्वोत्तर भारत च खराब मौसम दे चलदे आम जनजीवन पर माड़ा असर पेआ ऐ। असम च तेज बरखा करियै गुवाहाटी हवाई अड्डे दी छत्त दा इक हिस्सा ढेई गेआ ते खराब मौसम कारण डोआरिएं पर बी माड़ा असर पेआ ऐ। प्रधानमंत्री नरेन्द्र मोदी होरें इस हादसे च जान मोआने आलें बक्खी बसोस प्रकट कीता ऐ। उनें अफसरें गी निर्देश जारी कीते जे ओ प्रभावत लोकें दी मदाद करन। तोआई मौसम विभाग नै गलाया ऐ जे 5 अप्रैल तगर पश्चिमी हवाएं च बनी दिएं दौं खौदलें करियै हिमालयी क्षेत्र प्रभावत रौंगन।

मैहकमें नै दस्सेआ ऐ जे 6 अप्रैल तगर जम्मू कश्मीर, लद्दाख, मुज्जफराबाद, हिमाचल प्रदेश ते उत्तराखंड च गर्जोगर्जी कन्नै बरखा बरी सकदी ऐ। किश शैहरें च बर्फबारी जां किश थाहरें पर हल्की बरखा बरी सकदी ऐ। पंजाब, हरियाणा, चंडीगढ़ इस म्हीने दी 5 तरीक तगर पश्चिमी हवाएं च बनी दी खौदल करिये प्रभावत रौंहगन।

<><><><><><>

## Key

केन्द्र शासत प्रदेश जम्मू कश्मीर गी दऊं भौगोलिक खित्ते कश्मीर घाटी ते जम्मू च तकसीम कीते गेदा ऐ। जम्मू कश्मीर दा रकबा 2 लक्ख 22 ज्हार 236 वर्ग किलोमीटर ऐ, जेहड़ा देसै दे कुल रकबे दा 6.74 ते आबादी तकरीबन 1.56 करोड़ ऐ। कुल मतदाताएं दी गिनतरी 86 लक्ख 92 ज्हार 646 ऐ जिंदे चा 44 लक्ख 35 ज्हार 541 मर्द ते 42 लक्ख 56 ज्हार 946 महिला न। इस केन्द्र शासत प्रदेश च कुल 5 संसदीय हल्के न जिंदे चा 2 जम्मू संभाग ते 3 कश्मीर संभाग च औंदे न। जम्मू संसदीय हल्का ते उधमपुर संसदीय हल्का केन्द्र शासत प्रदेश दे कुल 20एं जिलें चा 8 जिलें गी कवर करदा ऐ। उधमपुर संसदीय हल्के च पैहले गेड़ दरान 19 अप्रैल ते जम्मू संसदीय हल्के च दुए गेड़ च 26 अप्रैल गी मतदान होग।

<><><><><><>

## Navy

भारत ते अमरीका बश्कार दपक्खी त्रि-सेवा मनुक्खी सहायता ते आपदा राहत H.A.D.R जल-थल भ्यास टाइगर ट्रायम्फ 2024 कल सम्पन्न होई गेआ। समापन समारोह विशाखापत्तनम च यूएसए समरसेट पर आयोजित कीता गेआ। एह सांझा भ्यास दौनें मुल्खें बश्कार निग्गर रणनीतिक सांझ भेयाली दा प्रतीक ऐ जेहदा मकसद बहु-राष्ट्री H.A.D.R संचालन शुरू करने च बेह्तरीन ते म्यारी रिवायतें ते मानक संचालन प्रक्रियाएं गी सांझा करना ऐ। इस म्हीने दी 18 तरीक कोला लेइयै 25 तरीक तोड़ी विशाखापत्तनम च इस भ्यास दा सर्बर गेड़ आयोजित कीता गेआ। जेहदे परैत 26 कोला 30 मार्च तोड़ी एहदा समुंद्री भ्यास आला गेड़ लग्गा।

एहदे मगरा काकीनाड़ा च सैनिकें दी लेंडिंग होई यानि सैनिक उत्थें उतरे। काकीनाड़ा ते विशाखापत्तनम कश भारती-नौसेना ते अमरीकी नौसेना दे जहाजें बशकार क्रॉस-डेक हैलीकाप्टर संचालन, UH.3-A ते MH-60-R हैलीकाप्टर बी चलाए गे। दौनें मुखें दिएं त्रौनें सेनाएं दे विशेष कारवाई-बलें बी इस भ्यास च हिस्सा लैता।

<><><><><><>

## Thiruvantpuram

आकाशवाणी दा तिरुवनंतपुरम केन्द्र अज्ज अपनी स्थापना दे 75में बरे च दाखल होआरदा ऐ। इस केन्द्र दी स्थापना ट्रैवनकोर रेडियो स्टेशन दे रूपै च 1943 च होई ही ते पैहली अप्रैल 1950 गी एह आकाशवाणी दा हिस्सा बनी गेआ ते इस साबबे आकाशवाणी तिरुवनंतपुरम दा जन्म होआ। इस मौके पर तिरुवनंतपुरम केन्द्र इस बरे तोड़ी चलने आले समारोह शुरू करोग जिंदा उद्घाटन मन्ने परमन्ने दे मलयालम लखारी जार्ज ओनाक्कूर होर करगंन।

<><><><><><>

## Turkey

तुर्कीय च मुख विरोधी घड़े नै मकामी चुनाएं च इस्तांबुल समेत मुखे दे किश सब्बने शा बड्डे शैहरें च बढत बनाई लैती ऐ। इस्तांबुल दे विरोधी घड़े दे मेयर एक्रम इमामोरलू जिने 2019 च बी इस्तांबुल च जित्त हासल कीती ही, होरें आक्खेआ जे ओ अपने इस्तांबुल शैहर, जित्थें ओ जम्मे-पले ते बधे मठोए, उत्थें परतिये जित्त हासल करने दे लक्ष्य गी हासल करिये मते खुश न। राजधानी अकारा च बी धर्मनिपक्ख राष्ट्रवादी विपक्ष दी स्थिति काफी मजबूत ऐ। मंसूर यावस जिनें 5 बरे पैहले एर्दोगन हुंदी "एके" पार्टी गी हराया हा, ओ ते उंदी इस्तांबुल पार्टी दे सैहयोगी इमामोग्लू दौनें गी 2028 च राष्ट्रपति दे औहदे लेई बेहतरिन मेदवारें दे रूपै च दिक्खेआ जा करदा ऐ। 70एं बरे दे राष्ट्रपति एर्दोगन होरें 1 करोड़ 60 लक्ख दी अबादी आले तुर्किय दे इस मेगासिटी च इक नमें युग दी सगंध चुक्कदे होई अपनी पार्टी दे चुनां अभियान दी अगुवाई कीती पर उंदी सरकार आर्थिक संकट कन्ने निबड़ने च नाकाम रेही ते अज्ज उत्थें मैहगाई दर 67 फीसद ते सूद दियां दरां 50 फीसद तगर पुज्जी गेदियां न।

<><><><><><>

## Miami Open Tennis

इटली दे जनिक सिनर नै अमरीका च मियामी ओपन दा मर्दे दा सिंगल्स ते भारत दे रोहन बोपन्ना ते उंदे आस्ट्रेलियाई जोड़ीदार मैथ्यू एबडेन नै मर्दे दा डबल्स खताब जित्ती लैता ऐ। जनिक सिनर नै दुनिया दे दुए नंबरै दे खडारी बुल्गारिया दे ग्रिगोर दिमित्रोव गी 6-3, 6-1 कन्नै हराया। इस खताब दे कन्नै गै सिनर, एटीपी विश्व रैंकिंग च स्पेन दे कालोर्स अल्कराज कोला बी अगगे पुज्जी गे न। तोआई डबल्स दा खताब अपने नां करने आती रोहन बोपन्ना ते मैथ्यू एबडेन दी जोड़ी नै क्रोएशिया दे इवान डोडिक ते अमरीका दे ऑस्टिन क्राजिसेक गी 6-7, 6-3, 10-6 कन्नै हराया। 44एं ब'रे दे रोहन बोपन्ना एटीपी मास्टर्स इक जहार खताब जित्तने आले सब्बने शा बड़्डी उमर दे खडारी ते सब्बने 9एं एटीपी मास्टर्स 1000 स्पर्धाएं दे फाइनल च पुज्जने आले दुए भारतीय बनी गे न।

<><><><><><>

## IPL

जंदी रातीं आइपीएल दे 13में मैच च दिल्ली कैपिटल्स नै चेन्नई किंग्स गी 20एं रंजें कन्नै हराई दित्ता। दिल्ली कैपिटल्स नै पैहले बल्लेबाजी करदे होई चिन्नेई दे सामने 192 रंजें दा लक्ष्य रक्खेआ जेहदा पिच्छा करदे होई चिन्नेई सुपर किंग्स दी टीम 20एं ओवरें च 6एं विकटें दे नुक्सान पर 171 रंज गै बनाई सकी। चिन्नेई सुपर किंग्स लेई आजिंक्य रहाणे नै सब्बने शा मते 45 रंज बनाए। जिसलै जे एम.एस.धोनी 37 रंज पर नॉट-आउट रेह। दिल्ली कैपिटल्स लेई मुकेश कुमार नै 3 विकटं हासल कीतियां जिसलै जे खलील अहमद नै 4 ओवरें च शड़े 21 रंज देइयै दऊं खडारी आउट कीते। एहदे शा पैहले दिल्ली कैपिटल्स नै टॉस जित्तिथै पैहले बल्लेबाजी करने दा फैसला लैता। डेविड वार्नर नै सब्बने शा मते 52 रंज बनाए जिसलै जे दऊं नंबरै कप्तान ऋषभ पंत दा योगदान रेहा। खलील गी प्लेयर ऑफ द मैच घोषत कीता गेआ। अज्ज मुंबई दे वानखेडे स्टेडियम च मुंबई इंडियन्स दा मकाबला राजस्थान रॉयल्स कन्नै होग।

<><><><><><>